

Grond support per la HTW

La realisaziun dal campus da la Scola auta per economia e turissem chatta sustegn

■ (anr/ac) **Gia en la debatta d'entrada han tant ils represchentants da las fracziuns sco er ils commembers da la cumissiun punctuà la valor da la Scola auta per turissem ed economia a Cuir per il chantun Grischun e la necessitad da realisar uschè svelt sco pussaivel in nov campus.** En in'unitad remarcabla e strusch usitada han ils represchentants da las fracziuns politicas en il cussegl grond signalisà il sustegn per il rapport preschentà areguard il futur da la Scola auta per turissem ed economia da Cuir (HTW). In rapport che circumscriba las investiziuns prevesidas en in campus a la Pulvermühlestrasse a Cuir cun integrar stabiliments existents. Critica ha la regenza grischuna stuì tadlar pertutgant l'evaluaziun dal lieu dal nov campus e dal temp duvrà per quella. Diferents votums han appellà a la necessitad da sepulir animositads personalas dal passà e trair en il futur vi dal medem sughet en la medema direcziun en chausa HTW. Analog ad ulteriurs votums ha il president da la cumissiun per politica statala e strategia, *Bruno Claus* (pld, Cuir), menziunà la gronda impurtanza da la HTW per l'economia grischuna da scolar personal dal fatg ch'è garegià dals manaschis grischuns. Il dumber da studentas e students a la HTW è creschì ils onns passads, principalmain students da l'ulteriura Svizra. Medemamain sustegn chatta l'indipendenza annunziada da la HTW che retschaivia uschia la pussaivladad da sa sviluppar. E sustegn ha me-



Il cussegl grond ha punctuà la valor da la HTW per il chantun Grischun e signalisà sustegn per las propostas da la regenza. FOTO Y. BÜRKL

demamein chattà il lieu definì a la Pulvermühlestrasse a Cuir per realisar il nov campus. Malgrà là manglusa colliaziun cun il traffic public che stoppia vegnir meglierada. Tenor il rapport quinta la re-

genza cun investiziuns bruttas da 125 milliuns francs a favur da l'infrastructura da la HTW e 90 milliuns francs è da purtar dal chantun Grischun. La dumonda da credit è da suttametter a la vo-

taziun dal pievel. E sche la solidaritad politica punctuada en il cussegl grond il mardi passa cuntinua ed il pievel grischun conceda il credit po il nov campus da la HTW avrir sias portas l'onn 2025.